



Title	漢文
Author(s)	岡山, 源六
Citation	懷德. 1934, 12, p. 35-36
Version Type	VoR
URL	https://hdl.handle.net/11094/88910
rights	
Note	

The University of Osaka Institutional Knowledge Archive : OUKA

<https://ir.library.osaka-u.ac.jp/>

The University of Osaka

內藤湖南先生六十壽序

岡 山 源 六

昔孔子刪虞夏商周之書。定爲尙書。本周禮。因魯史。以修春秋。則皆史而進於經。蓋上世史與經合理筆。體法靡有所分也。漢司馬氏作史記。紀傳以統君臣。書表以譜年爵。實爲史體正宗。然疏通知遠。屬辭比事。非尤其所致意。故視經嚴旣弗如矣。班范而下遞相祖述。純以龍門爲鵠。則亦於尼丘法無取焉。史乃退於經矣。夫史者經之案也。經不得史。無以證其褒貶。經者史之律也。史不得經。無以酌其輕重。則史未始不與經會通於古今得失之林者。豈其進退所能繫哉。然今之治史者。蔽於其已非經。而自與經絕。不挹而注。不參而互。脫令證褒貶酌輕重焉。將逡巡而自謝不暇也。古人有言。迎之以隙開。待之以懸遇。內藤湖南先生閱識孤懷。其學能特得於此者也。然世止知其老於史。而不知復老於經。蓋治史者。不知史與經體法雖分。猶能沆瀣一氣也。則世安知旣能老於史。當復老於經耶。往歲先生嘗論

易彖象失經義者。爻辭於古無有者。序卦言卦義與說卦雜卦不類者。一切鉤抉而考覈。竝爲卦初不必六十四。爻亦五六不齊。筮宿由卜來說。以爲十翼率有秦漢人作。乃著易疑數篇。以前儒所未牖道居多。名以疑。意其自巽爾。先生之於經。可謂亦老矣。今年爲先生六十初度。朋好門生胥謀。論次其素所述作。且圖其肖像。將以頒海內外知交。源六服役殊邦。弗克躋堂稱觴。樂爲先生壽。因質言經史同源之義。惟先生幸存之。而即以爲頌祝。望外之喜也。昔者曾南豐師事歐陽廬陵。廬陵嘗爲撰其先大父墓誌銘。輒謝曰。鞏之感與報。宜若何而圖。源六未及先生門。而向者觀文數篇。謬貺寵薦。其感與報。以視南豐當有加也。近數十年來。我國經史之學。日就榛蕪。若源六之駭。亦深用慨歎。即欲挽而回頽勢。恨才力綿薄。靡由負荷。常自警以競競弗墜所業。後有力者起。俾繼而振作焉。是則所以報先生於萬一也與。